

■ SEXUALITAD

Adebar fa alarm
pervi da mulestas sexualas

(cdm/fmr) Il post spezialisà Adebar fa alarm perquai che adina dapli uffants e giuivens en il chantun Grischun èn confruntads cun violenza sexualisada e cun «cyber-grooming». Quai scriva il post en ina comunicaziun a las medias.

Adebar, il post per la sanadad sexuala e per planisaziun dal famiglia, è activ en bleras vischnancas dal Grischun. Sin tut ils stgalims scolars fa Adebar prevenziun en dumondas d'abus sexual. Sco Adebar observa actualmain en ils uffants ed ils giuivens adina pli exposts a tals abus causa la digitalisaziun. Adina dapli delinquentas e delinquentes nizzegian l'anonimitad da la rait per s'avischnar cun intenziuns sexualas als minorens, l'uschenumnà «cyber-grooming».

La manadra dal post, *Susanna Siegrist*, constatescha en quel connex: «En l'instrucziun – e quai sin tut ils stgalims – rapportan ils uffants u giuivens adina pli savens da surpassaments en las medias socialas.» Quel svilup haja anc s'accentuà il davos onn. Perquai haja il post Adebar decida da far ussa alarm. Era perquai che blers uffants e giuivens hajan tema dad ir u clomar per agid. *Corinne Rietmann*, pedagoga da sexualitad tar Adebar, expligta: «Sin il stgalim superiur èsi savens gia «normal» da survegnir malets da penis u dumondas fitg explicitas. Sco exempel numna Corinne Rietmann quel dad ina 5avla classa, nua che mo duas da duresch scolars n'hajan anc mai survegnì in maletg d'in penis dad in creschì. «Talas cifras fan tema» – uschia la pedagoga dad Adebar.

Las mulestas sexualas èn tenor il post spezialisà gia fitg derasà, surtut tar matatschas. Statisticamain èn gia var 50% dals giuivens en Svizra pertutgads.

Perquai appellescha Adebar surtut a l'attenziun dals geniturs e creschids che duain accompagnar, cussegljar e sustegnair ils giuivens en lur cumportament sin las raits socialas.

■ CHASA EDITURA

Cudeschs rumantschs
èn stads dumandads

(rtr/fmr) Il 2020 ha la Chasa Editura Rumantscha pudì edir tschintg novs cudeschs, ina reediziun e plirs e-books. Er la vendita da cudeschs rumantschs saja stada legravlamain stabila. Il 2020 sajan puspè vegnids vendids passa 2800 cudeschs, da quai bun 30 en furma digitala. Quai ha communitgà la Chasa Editura Rumantscha il mardi da sia radunanza generala.

En pli sajan trais da sias ovras er vegnidas publicadas en autras linguas, numadamain per tudestg, franzos e talian. Sco la CER scriva, saja quai ina impurtanta irradiaziun da la litteratura e lingua rumantscha.

■ TURITG

Colloqui rumantsch
cun Renzo Caduff

(cdm/fmr) L'Universitad populara da Turitg envia ad in proxim colloqui rumantsch. Mardi, ils 11 da matg 2021, a las 19.00, preschenta il romanist *Renzo Caduff* la publicaziun «Giachen Mihel Nay – Tgil e tgau en treglia», la quala Caduff ha cumpilà e realisà. Il cudesch cun texts sur e da Giachen Mihel Nay ha la Chasa Editura Rumantscha edì l'onn passà.

L'occurrenza a l'Universitad populara vegn organisada da la romanista *Mevina Puorger* e vegn sustegnida da l'Uniun da las Rumantschas e dals Rumantschs en la Bassa URB. Causa la pandemia da corona han lieu tut quests colloquis rumantschs actualmain en furma digitala via zoom.

Persunas interessadas al colloqui sa drizzan a *mevina.puorger@bluewin.ch*, 079 331 68 61 u al secretariat da l'Universitad populara: 044 205 84 84/044 205 84 94.

Avrir la porta a l'agid da murir

La regenza è pronta d'adattar la lescha da sanadad

ANDREAS CADONAU/FMR

■ La regenza grischuna è pronta sa stgaffir la basa legala per conceder il dretg ad abitantas ed abitants da chasas da vegls e da tgira da clamar sustegn extern per terminar la vita ord libra veglia. Ella accepta, cun intginas adattaziuns, l'incumbensa dal suppleant da deputà, *Pascal Pajic* (PS Cuira). Il dumber da persunas che vulan reglar sezzas la fin da lur vita crescha. Almain sch'ins resguarda la commembranza dad organizaziuns che porschan sustegn per terminar la vita ord libra veglia. Var 130 000 commembras e commembers dumbra la pli gronda organizaziun svizra (EXIT) ch'acompogna sin giavisch umans sin il davos pass da la vita. Ad abitantas ed abitants dad instituziuns da tgira e da vegls en il chantun Grischun – che giavischan sustegn extern per terminar la vita – n'è quel sustegn betg garantì.

Timun decida

Sco quai ch'il suppleant da deputà *Pascal Pajic* (PS Cuira) scriva en sia incumbensa inoltrada a chaschun da la sessiun dal favrer 2021, decidan ils purtaders da l'instituziun u il timun dal manaschi, sche quest sustegn extern dastga entrar en chasa. *Pascal Pajic* ed ils consutsegnaders èn da l'avis ch'in eventual tractament inegual tar las instituziuns da tgira e da vegls grischunas na saja betg acceptabel. Tant pli visavi a las disposiziuns legalas dal Tribunal federal e vers la Convenziun europeica dals dretgs umans. «Il dretg da decider en atgna competenza cura e co terminar la vita è in dretg fundamental ed uman ch'è da resguardar.»

Sustegn è legal

Quest'opiniun po la regenza sustegnair, sco ella scriva en sia risposta. Tranter auter menziuna la regenza las persunas che sustegnan in uman da realisar ina conclusiun gia prendida da far suicidi. Quellas persunas na vegnan betg chastadas tenor l'art. 114 dal Cudesch penal svizzer (CP; CS 311.0) – «sche l'uman che vul murir è abel da giuditgar, sch'el po agir sez e sche la gidantra u il gidanter n'agescha betg per motivs egoistics. Ord vista dal dretg penal è l'agid al suicidi problematic tranter auter, sche l'act da suicidi n'è betg vegni exequi en atgna responsabladad u sche la persuna che vuleva far suicidi n'era

betg abla da giuditgar.» La regenza conceda ch'en il chantun Grischun na saja il tema «agid a la mort» betg reglè en ina lescha. «En las chasas da persunas attempadas e da tgira vegn l'agid a la mort pratigà en differenta moda e maniera.» Sch'ina instituziun admetta l'agid a la mort en sias localitads u betg, vegn decida dals purtaders ensem cun la direcciun da la chasa da dimora e cun la direcciun da la tgira, scriva la regenza.


Porscher ina buna tgira

Christina Tuor e *Birgit Werner* ch'èn responsablas per la chasa da vegls e da tgira a Cumpadials han concedi da mai esser stadas confruntadas, enfin ussa, cun

ina dumonda concreta per sustegn da terminar la vita. *Christina Tuor* ha ditg che la chasa a Cumpadials dettia gronda paisa a la tgira palliativa. «Ina tgira che po levgiar e supportar las davosas uras da la vita.» Sche cussadentas e cussadents sajan conscients dal sustegn na sajan dumondas da terminar activ la vita betg pli acutas, ha *Christina Tuor* ditg. Las manadras da la chasa da vegls e da tgira han formulà ina clera posiziun, sch'ina cussadenta u in cussadent insista sin ses dretg da murir. «Sa chapescha che nus discurrin tant cun il pertutgà, ses confamigliars ed era cun il personal.» *Christina Tuor* ha fatg attent che la decisiun da terminar la vita na pertutgia betg sulet la persuna che veglia murir. Cun quella decisiun ston blers vegnir a frida. «Portan ils discurs cun la cussadenta u il cussadent che giavischan sustegn da terminar la vita nagin fritg, lura acceptain nus sia decisiun.»

Adattar la lescha

Acceptar cun intginas adattaziuns vul la regenza grischuna era la proposta d'adattar la lescha da sanadad, e conceder a cussadentas e cussadents da chasas da vegls e da tgira il dretg da clamar organizaziuns externas per in suicidi accompagna en instituziuns sustegnidas dal maun public. Cun bleras dumondas na vegnan las instituziuns betg ad esser confruntadas. Sco gia *Pascal Pajic* scriva en sia incumbensa, è il dumber da suicidis cun assistenza medicinala fitg pitschen en Svizra. «Tant en cifras absolutas sco era en relaziun cun tut ils mortoris.»



La regenza è pronta dad adattar la lescha da sanadad e conceder il dretg als cussadents da chasas da tgira da clamar agid extern per terminar la vita. FOTO MAD



Il concern svizzer Implenia reducescha sias sedias en il chantun Grischun. FOTO TWICEPIC CC BY SA 2.0

150 persunas teman per lur plazzas

La firma da construcziun Implenia stritga plazzas da lavur en il Grischun

■ (cdm/rtr/fmr) Il concern da construcziun svizzer Implenia vul serrar en il Grischun quatter da tschintg lieus. A Cuira resta l'interpresa cun ina purschida reducida cun 20 collavuraturas e collavuratur spezialisads. 150 persunas vegnan a perder lur piazza. Ils sindicats Syna ed Unia pretendan che Implenia desistia da desditgas da plazzas. La firma da construcziun Implenia serra enfin la fin da l'onn sia sparta da construcziun bassa, da vias e da construcziun auta en il Grischun e cunquai bunamain tut sias sedias en il chantun. Pertutgadas èn quellas a Tavau, Zernez, San Murezzan, Segl en Engiadina sco er la gronda part da la sedia a Cuira. Pertutgadas da quest tagl radical da l'interpresa Implenia èn radund 150 persunas che ston uss temair per lur piazza da lavur.

Raschuns economicas

Il concern svizzer numna envers RTR diversas raschuns per quest pass, uschia

er las particularitads dal martgà grischun: La fatschenta en il chantun saja fitg locala e stagiunala e per gronda part sa tracta be da pitschens projects. En pli dettia en la branscha da construcziun grischuna ina surcapacitad, uschia ch'il squitsch da concorrenza saja grond.

Tge capita cun il personal?

L'avegnir da las 150 persunas pertutgadas è anc intschert. Sco Implenia ha ditg envers RTR, duain per part auters impressaris regionalis surpigliar il personal. I haja gia dà emprims discurs tranter Implenia ed auters impressaris. Er il concern svizzer sez veglia – nua adina pussaivel – porscher vinavant ina piazza ad ina part dal personal. Per tgi che perdia la piazza dettia in plan social. Pertutgads da la serrada èn lavurers da construcziun, magasiniers e personal da biro.

Il personal saja vegni infurmà mardi en damaun davart ils plans. Il concern ha instradà in proceder da consultaziun.

Sulet projects gronds
en il Grischun

Projects d'infrastructura ch'èn gronds e complexs veglia il concern svizzer far vivanant er en il Grischun. Sco Implenia ha ditg envers RTR sajan quai per exempel projects da construcziun da rodaglias u tunnels. Però vegnian quellas lavurs fatgas sur las sedias dador il chantun. Ultra da quai resta il concern a Cuira cun activitads en la construcziun auta – quai per prestaziuns complessivas e construcziuns prontas per la consegna.

A Cuira restian uschia radund 20 dals 170 collavuratur che l'Implenia fatschenta actualmain en il Grischun. I sa tracta da personal fitg qualifitgà e da persunas che lavurian gia divers onns tar la fatschenta, sco Implenia ha ditg sin dumonda.

Sindicats pretendan
da desister da desditgas

Ils sindicats Syna ed Unia crititgeschan cleramain quest pass. Malgrà ch'ils car-

nets d'ordinaziuns sajan bain emplenids, sche betg schizunt enorm bain, veglia la direcciun dad Implenia Svizra surtut maximar il gudogn enstagl mantegnair plazzas da lavur. Quai scrivian ils sindicats en ina comunicaziun communabla.

Ils sindicats pretendan perquai dad Implenia da desister da desditgas da plazzas. L'interpresa duai valitar pli aut sia responsabladad envers ils collavuratur che finamiras da rendita a curta vista. Ultra da quai pretendan ils sindicats da prolungar il termin da consultaziun enfin mez da zercladur.

Implenia è ina interpresa da servetsch multinaziunala da bajegiar ed immobiglias. En Svizra ha Implenia ina posiziun dominante en il sector da bajegiar e dad immobiglias. En l'Austria, Frantscha, Svezia e Norvegia planisescha e construescha l'interpresa tranter auter tunnels complexs. Actualmain ha Implenia en l'entir concern radund 8700 emploiads.